

長沙府嶽麓誌

長沙府嶽麓誌卷之二

丁大中丞鑒定

郡丞趙 孟纂修

瀕山陶之典訂

山水

嶽麓在湘江之西一名靈麓以其承跗衡山是爲
嶽足濱江而立傑然一峯高明廣大具嶽之體踰
湖至於長沙氣象爲之一開自平地以取山巔可
七八里蜿蜒而降舒岡布嶽以山稱者爲大天馬
爲小天馬爲官星爲人字爲碧虛而橫秀於外者

爲玉屏凌虛縹緲而獨以峯稱者爲雲麓此皆天作之勝也其因人事而彰以洞稱者爲抱黃以蹊稱者爲禹蹟以谷稱者爲簪簪以峽稱者爲清風以林稱者曰道以嶼稱者曰西其支出者爲金牛金盈諸峯迤而右翼之以達於新江其迤至者爲圭峯雲母諸山趨而左衛之以達於滌潭而交匯於湘江以成麓山之門戶凡巒壑之大概在是焉若夫崖竇之源則玉流飛布銀漢落天觀奇矣乃更有泉曰白鶴匯而爲蘭澗爲石瀨爲清心濯纓

池其外更鑿沼導山中清流以爲漸被之地曰曲
水是又澄淵芳潤之溢於山靈者其表裡可測也
而山水之發靈於人與人之增重於山水者則莫
如嶽麓書院其地爽塏其林蔚茂宋開寶年太守
朱公洞勑建書院其中凡殿閣齋祠亭臺軒沼之
宜有者先後制咸備當時名臣大儒師帥潭州倡
道講學奉 詔賜額頒經聘山長立三舍法極一
時之盛語詳書院記中歷元與明代有修舉大率
自書院講堂文廟齋祠外諸所爲軒亭臺榭照耀

於岩谷間者多廢不復葺今丹雘煥然文儒蔚起
雲霞蒸變之氣山川復爲之改色固未可以登臨
遊覽之地概之也雖然遊覽亦有道焉山之以峯
稱者雲麓也雲麓高出羣巘石骨奇拔絕磴巉懸
使登者能造其極則衡山九嶷蒼梧之色在其南
赤沙青草洞庭之波在其北天空氣灝萬象森呈
凡洲渚之漁村浦樹隔江之城郭樓臺並在衽席
間于以縱俯仰千里之目披瀟湘八景之圖悠然
於疏鑿之所以勞封建之所以固星文之所以顯

草木之所以芳風土今昔之所以異名山德業之所以垂才人遷客之所以留連仙灵秘跡之所以出入其於遊覽庶有裨乎至其間亭榭寺觀向爲觴詠之資與夫黃冠緇衣之所聚處自晉以後至今千數百年廢興相嬗或髣髴遺墟或傳聞記牒付之不可得見斯已矣惟是大禹隨刊之碑亭朱張講學之舍陶桓公射蛟除害之臺六君子以下凡有惠於教育者之祠之蹟日月爲昭湘嶽並永詎可不表章乎蓋茲山之高明廣大實與古聖賢

名臣碩儒所造就事功德業相爲映發自昔引匡廬白鹿與之分勝非但擬於大別之當鄂州也故麓山之重於衡嶽爲負荷於洞庭爲敷抒予故先總其大者而叙論之而分紀其洞壑林泉之目以系於後云

舊志嶽麓山水總記

衡山之峰七十有二綿邈幾七百餘里迄長沙湘江之西而盡則嶽麓也峭壁擎空聯巖疊嶂可數十里許東面豫章瀏醴諸峰縹緲天際北

濠洞庭湘水澄徹如疋練峯頂東西廣約五丈
南北倍之惟石奇偉懸絕磴一片如屏禹碑刻
其上碑石一坎爲神禹拖船圯泮水懷山襄陵
其信然哉折而南兩峰環抱中函夔隅幽清而
行泉聲淙淙瀑布落風雲亭嶽麓寺峰也又折
而南倏伏倏起土不勝石而石骨蒼秀色古蒨
隨拔一峰如伏釜覆鐘碧樹千章綠光隱隱浮
動若懸巖石砥凌虛嵌空則雲麓宮峰也峰降
若干級江流環帶中拓一坪如掌再折而東盤

旋逶迤特據紅巖大天馬山也折而北爲抱黃
洞崇真觀諸山修坂疊巘幽渺弘曠又折而北
羣峭駢連面南顧以趨於東道林桃園小天
馬山也再折而北崔巍樹石糾竊蒙茸爲官星
山人字山嵒嶙平行駁霞騰霧爲玉屏山是又
茲山衣履之所覆護焉其他圭峰雲母滌潭隸
左臂金牛金盤旗鼓靳江隸右臂總以成嶽麓
勝概而爲星沙一大觀也登山之逕匪一自郡
城從上渡過漁村三里登岍從下渡過橘洲歷

禹蹟蹊五里登岸從古渡半里達中洲僅一帶
水登岸宋朱張講學胥由此代有浮橋而今廢
矣一岸濱江約四里爲古柳堤中有石坊曰嶽
麓書院宋真宗賜額也岸內有湘西書院舊址
進而爲梅堤爲咏歸橋爲濯清池約三里抵書
院入靜一堂登尊經閣朱晦翁手書忠孝廉節
四大字齋館號舍各若干楹閣後有堂翼然祀
六君子石壁鐫紫陽遺蹟近北爲流觴曲水亭
百泉軒源自白鶴泉歷蘭澗瀉來轉入洗心濯

纓池一綫清流呀沙漏石昔人所謂冷煖與寒暑相變盈減經旱潦不異者非耶右有宣聖殿承以崇臺盤以文石虬柱雲櫺華梁藻井令人有宮牆數仞思擎杉百本幹不甚巨而鱗鬣葉鬚繁如覆髮晉陶士行所植以壯菴居者菴近藏書閣舊址久就芾沒其他古柏蒼松修篁巨楮菁茂離披卽蔚藍光碧之境盍啻過之左爲山齋舊址殿後高阜百級上有四箴亭又上卽朱張講學處也今古名人碑刻列焉稍進故孫太

守建亭於赫曦臺山下而今以祠道鄉先生矣
降而箸簋谷舊鍾仙巢吹香亭宋理宗筆也趨
而上有崇真觀晉鄧郁修鍊處也久與萬壽宮
射蛟臺俱屬榛莽隨捫蘿附篠以登僅抱黃洞
在焉尋循小徑轉磴道蜿蜒峻絕不可步每以
一足蹠蹕行左右皆萬仞之谿無可倚歷千餘
級登中庸亭憩焉自是愈高愈險每以肘代踵
更歷千餘級憩高明亭古赫曦臺基也再轉數
百級達禹碑亭於時色相斐然神彩煥發嶽麓

之奇當無最此也從禹碑由故道翼而下出標
星門覓雨花論苗兩臺基北海碑峙山麓傍有
朱元章數字碑經千餘年曾木少泐豈三絕神
奇應亦有山靈呵護耶由此渡清風橋望蘭澗
石瀨水石相駁激如花如雪泝碇有聲登清風
峽風雩亭道鄉臺雪觀諸古蹟恍在虹光嵐黛
間轉入嶽麓寺不數武經觀音閣視白鶴泉一
線泉石隙中瀝瀝出甘冽異諸水循僻岩數百
級上講經臺宮殿壯麗甚駁後依巖建靜院修

廊廊外緣峯岩泉互相照耀僧人剝竹從岩畔
取泉聲韻更悠諸如古峯修柯朱藤蔓絡幽閒
繡森當不讓三山五院返峽南趨皆奇石塊而
伏者銳而昂者如獅如狒如魚鳥者幾經轉曲
層疊上雲麓峯絕頂昔金道士禁足處也後泐
鐵爲瓦鑿石爲柱建宮祠玄帝右五岳帝祠附
焉四面環繞多珍木茂樹輪囷扶蘇而南首琅
玕近千個倚欄憑眺谿谷田隰岡阜林泉江河
波濤洲渚城郭王居廬井俱在紫氣青煙中稍

降有石飛岩外如伸鷗首面平如砥約二丈土
人豎石爲柱爲欄覆亭其上拜衡岳石下空深
近數丈闊之毛髮皆豎百千簇竹樹自下迸起
勁挺凌霄姿態百出又轉一奇觀已從石趨南
降百十級山自峯頂纍疊下圍垣高護谷中土
石紋緻控昭霞而襟湘水其野秀更異他山自
山左漸趨漸下過尿歸橋越桃園至道林坪古
有道林精舍四絕堂石浴池道林寺又別有天
地也四面高山環合異石懸巖若舞獸翔禽雲

霞映罨五色氤氲澗流山泉飄風激滂激石炫
鏗可當一部鼓吹遠望樸夫牧豎隱躍如圖圖
中人對面三洲水陸寺屹然江心爲麓山開捍
漁舫巨艦繚繞上下水光烟波呈巧獻奇有是
哉嶽麓之勝甲湖南而光今古也然而嶽麓之
傳自書院其重以朱張况乎禹碑蝌蚪千秋欣
慕邈漢晉唐宋以迄於今帝子名賢禪宗羽客
風韵如新夫豈非山川奇異足暢襟期而開清
曠之致耶

大小天馬山

從下渡過橋洲達于岸盡平輭約二里乃入谷口
行田村中遂不見峯色稍前將抵禹蹟蹊一角露
青自山右逶迤西南出雙峯隆起而中窪向東北
者首稍昂投江而奔有騰蹕之勢其形偪馬若先
驅開道者然是爲大天馬山其下一岡紆折亦聳
兩巒差縮形勢絕相類曰小天馬山從外觀之皆
可指數

碧虛山

碧虛山與道鄉臺相左右迴環互抱鬱爲勝境昔
人建亭其上名曰風雩故又名風雩山上有修篁
碧樹翠蔭成林下有蘭澗窪泉石瀨相屬登眺之
際清迥異常所謂麓山景趣在道鄉碧虛間信不
誣也風雩亭今毀無存若所謂雪觀者則自昔已
湮沒矣其右爲嶽麓寺傳稱長沙第一道場李北
海寺碑云雷激庭際月飛窓裡其虛敞勝概尤爲
獨絕云

舊志風雩山圖說

卽碧虛山

山峯聯疊兩枝互相環拱中多修坂層巖左爲
碧虛山古有雪觀右有朱張所築道鄉臺事詳
道鄉傳中南軒云麓山景趣在道鄉碧虛間建
亭其上名風雩皇明萬厯中僧妙光募剏講經
臺萬法堂藏經樓閣院堂廊山泉竹木近三天
而羅萬象此長沙第一道場下有觀音閣白鶴
泉泉出石中甘潔不涸常有白鶴飛止石巔刻
石記之閣前麓山寺西晉大始四年法宗禪師
建而法道禪師繼成之至唐司馬竇公覓李北

海碑書黃仙鶴篆刻遶及國朝莊嚴備具僧舍
庭院若干楹寺在峯口平地縱橫千餘丈爲清
風峽當溽暑時清風徐來人多憩息于此古有
亭橋峽中泉流觸石有聲爲石瀨源自白鶴泉
流來其下爲澗有蘭生其中又名蘭澗直瀉至
雨花臺道旁北海碑在臺右米元章書數字於
碑側摹本者如雲成化太守錢公澍方覆以亭
碑歷千餘年而不少剝蝕碑右則晦菴論苗臺
舊基矣

禹蹟蹊

蹊在山口距大江五里大禹疏鑿開山之逕上有
拖船埧明德被人萬世不替負笈來者敬思惜陰
當從此始

抱黃洞

抱黃洞在禹碑北遼谷中穹石虛杳亦堂亦與自昔爲煉師所居有冲舉者因以爲名後遂有萬壽宮崇真觀之構居者旣去宮觀尋墟於是蛟蟒之妖竊據以爲宅晉都督陶桓公鎮郡時引弓射蛟應弦而殪岩谷爲之廓清美箭蒼松復臻游勝至有宋端平中山下鍾尙書特署簪簪之谷名理宗帝預灑吹香之宸翰而洞壑之遇斯寵絕矣

惜今
蕪塞

不可入

舊志抱黃洞圖說

禹碑北石山修曠四圍峭峭人跡罕至從前一
徑入環視上下左右煙雲靉靄傳古來有道家
者流於巖下修鍊丹成飛昇去遂名爲抱黃洞
土人建萬壽宮崇眞觀衡山志稱西晉初年鄧
郁靜息觀中羽化未幾而宮觀頽矣至東晉洞
有鱗患吐舌爲橋熠目爲炬作聲爲八音歲七
月望夜飛瞰於西門白鶴樓爲羽流導引歲次
一人登樓其徒又醮以送之都督陶侃異而不

信引弓射其炬卽時猝滅灑血如雨次日踪跡
得之蟒斃於洞俗名曰蟒蛇洞建射蛟臺於旁
以鎮之觀下多美竹宋端平中鍾尙書仙巢於
此游息名曰簪簪谷建亭曰吹香亭贈焉仙佛托
防禦時與鍾善親書仙巢吹香亭贈焉仙佛托
蹟之地卽興廢靡常而境轍自不凡也

簪簣谷

簪簣谷在抱黃洞口朱仙巢先生鍾尙書閒居處
舊志云香風紫霧曲澗清泉冷冷相襲動人世外
之思宋理宗有詩云放鶴去尋三島客任人來看
四時花上有吹香亭吹香字理宗爲防禦時題贈
仙巢先生者今廢

道林

離碧虛盤紆而下衍爲平拓之區者道林也林蔚
茂而谷幽清得碧虛之氣大江在其襟袖雖燒柵
亂流風濤飛雪而深靜自如可以體道杜少陵花
鳥友于之句非身歷其妙不知唐馬燧作藏修精
舍名曰道林有以也當時有四絕堂曰新盤等勝
蹟久廢山均有道林寺今學佛者猶能循其故處
結廬建刹而精舍遂無繼者或曰有待而興今豈
非其時耶

舊志道林山園說

漢唐以前郡邑無耑學人各有精舍往往小勝地卒業焉嶽麓山左有坪奧衍大江橫前亦墮亦寂佳勝莫此若焉李唐時馬燧建有精舍顏曰道林謂其爲道之林也建堂曰四絕謂沈傳師裴休筆札宋之間杜甫篇章宋治平中蔣之奇作記以爲遺歐陽詢而錄裴置韓愈而取宋非也乃銓次高下沈書一歐書二杜詩三韓詩四爲四絕右有石池名曰日新盤傍有寺亦稱

道林歷後唐馬殷重建結構崇隆廟院雲連僧
眾至三百餘歷宋更甚國朝弘治中寺制猶存
正德四年守道吳世忠謂寺爲淫祠毀之以木
石修書院夫寺原精舍卽改寺爲精舍可也而
竟兩廢之何耶迄今一望丘墟遺址多歸豪右
矣

清風峽

清風峽在嶽麓寺前雙峯相夾中有平壑縱橫十
餘丈紫翠菁葱雲煙載目登其上望雪觀風雩則
停雲撲翠望蘭澗石瀨則潏玉飛花雖橋亭久泐
而勝韻自存也當溽暑時清風徐至人多憩休故
名以此得

雲麓峯

雲麓曼絕諸巒石骨巉峭非遊屐所得狎登絕頂望南嶽以上之山三石以下之水杳靄空明千里在目其松篁嘉木之蔭多由昔人種植而成明隆慶間有金道士作雲麓宮鑿石構殿覆以鍍瓦其棟漢凌風縹緲可想金道士栖真於此多歷年所張陽和殿元訪之與語契合金道士名益以傳岩右有石縱橫二丈飛岩外平砥可息上人構亭其上瞻望衡嶽而拜曰拜嶽石殊韻蓋茲峯巖壑之峻

本於雲根而其佳勝亦在石云

舊志雲麓峯圖說

峯巒聳特石骨磐紆木竹菁葱爲諸峯最卽洞
真虛福地也舊有宮殿廢沒已久國朝嘉靖太
守孫復令道士李可經增樹松柏桐梓篁篠千
本茂蔚更奇倚南岫邊僅茅舍一區隆慶間金
道士隱此禁足不數年從峯頂中冶鐵爲瓦鑿
石爲柱構殿五間祀立帝後爲三清殿前爲堂
爲門名曰雲麓宮未審道士何許人張陽和殿

元偶訪之與語顛漸道士曰心心如赤子念念
合金丹纔說顛漸便落二義陽和竦服後道士
以上壽去而此地輒稱佳勝宮右爲五嶽祠前
峻巖有石縱橫二丈飛巖外名飛來石土人構
亭於上瞻望衡嶽而拜又名曰拜嶽石從石下
曲阿森繡松杉掩映山峙湘環又別是一番大
觀矣

玉屏山

玉屏嶽麓支山碧嶂平開秀如琢玉獨離麓崢嶸
卓若自致青雲而以器業顯其門庭者昔人題詠
云玉屏山外一峰青美其能不附麗也

西嶼

西嶼在嶽麓書院右平林崧嶽可選石坐朱張往
嶽麓時嘗從橘洲達岸以東渚名洲而以此地名
之曰西嶼

白鶴泉

鶴泉在風雩亭下泉出石竇其冽絕倫嘗有白鶴
守之刻石記其上昔人謂冷煖與寒暑相變盈縮
經旱潦不異蓋山中第一芳潤也

石澗

澗在清風峽下泉流觸石琤琤有聲是爲石澗南
軒遊息聲山時最賞其處有窮年竹根底和我讀
書聲之句

蘭澗

蘭澗在石澗下芳清可鑑修澗盤紆承鶴泉之素

源敷湘蘭之紫跗直瀉入雨花臺可知泉流之潔
與碧滋淡漸矣

飛來湖

飛來湖在鳳陽山前橫塘數畝小成湘碧可釣可
泛江臯重岫旣遮斷大江嘗星月倒映鷗鷺宿煙
一泓之清勝於千頃宋洪覺禪師有詩云連蕩蒲
秋色小艇藏菰蒲想見當時此湖殊不寂莫今荒
若閒田游者不顧山水之顚晦因時蓋不獨茲湖
爲朕矣

湘江

合瀟水蒸水而成湘乃合沔淶諸水下合斯水至
長沙而澄泓漾碧是爲湘江湘中記曰衡山東南
二百臨映湘川自長沙至衡七百里中有九背故
漁者歌曰帆隨湘轉望衡九面此言湘之與嶽爲
潏洄也水經曰湘水北逕北津城西西對橘洲又
曰北會羗官水口爲湘浦此言湘之與嶽麓爲渟
涵也又曰湘水清照五六丈下見底石如樗蒲五
色鮮明白沙如雪赤岸若霞此合麓江東西而寫

湘水之至清而呈奇也是則嶽趨於江而爲麓湘
會於麓而爲江湘與嶽之相成可考也夫水至于
長沙將積爲三江放爲重湖氣非不浩淼也而洲
浮橘樹潭馥蓮花其芳清畧與者始一與麓山之
泉澗潛相澹漸故麓之德常新湘之氣常靜也若
夫沐浴星雲湔淘今古湘之貺湖南也無涯矣

舊志湘江圖說

水自西粵北流而下曰湘謂由靈渠卽與瀟水
蒸水相合也自合洙水淥水漣水涓水斡水至

長沙澄泓汪濊其色清而不駛白而漾碧湘中
記云湘水至清雖深五六丈見底了了石子如
樗蒲白沙如雪霜赤岸似朝霞巨艦舳舳杯浮
蕩漾江心有潭曰蓮花清秋良夜蓮浮水面三
洲居中流可十里若曳疋帛而實不相連故古
傳三洲連出狀元之讖朱張以東渚名之而以
西嶼名嶽麓漁人誅茆架屋近百楹憑江一望
鋪青縈紫景趣更宜干春于夜于雨雪中洲卽
古渡舊有浮橋去嶽麓僅一帶水宋安撫劉珙

置船數十以待往來學者遊息名曰船齋下洲
多美橘稱橘洲水極泛漫洲獨不沒昔人所謂
昭潭無底橘洲浮是也洲盡處寺曰水陸元濟
應禪師建寺後爲拱極樓約高六七十尺仰瞻
嶽麓似在雲端俯矚湘江如鏡光浮野千里之
風排欄而入梵音鐘磬與漁歌互應達嶽麓岸
上爲古柳堤下爲禹蹟蹊郡守季彭山勒坊記
之

橘洲

土中下三洲沙石團水面而起可十里承平時居民百餘家望之如帶實不相連橘洲在下水極泛時洲獨不沒昭潭無底橘洲浮古志之矣洲盡處有寺曰小陸寺後爲拱極樓江心樓閣受麓色最親而風煙排蕩波月光連尤爲曠絕視柳下漁舟稀網落日圖畫天然樓上嘗有人書聯於壁間曰五六月間無暑氣二三月裏有漁歌此真景也寺閣數毀於兵亦數經修葺人家今存者十一若橘

荷之族不知化於何代矣

靳江口

靳江口卽瓦官水口湘浦也從湘鄉萬歲塘來經寧鄉麻山過楚大夫靳尚墓前出水經曰逕瓦官西湘洲商舟之所次也麓西南諸山森秀百疊翌麓而至者此水皆逶迤隨之

滌灣潭

滌灣水出麓山左自之字港來曲折數十里爲滌
潭可通舟楫江二里穿孔道繞滌灣市北以出將
人大江漸爲潭阜阜廻環江氣歛萃麓山之門森
然有辨矣

古蹟

傳曰山不在高有仙則名蓋言地以人重也故
凡志乘所載必列古蹟既可以攷今昔亦可以
廣見聞且思古人而不得見見其蹟如見古人
焉嶽麓上有岵嶇摹碑虞夏之書魏狀獨存下
有書院爲宋朱張講學明道之處其所品題興
建爲蹟尤多若夫陶桓公之射蛟除害不惑朱
文公之論苗舞干可追至于北海之碑旣稱三
絕而道林之側復有四絕堂仙巢吹香旣爲朱

帝潛邸之書而忠孝廉節又爲大儒朱子之筆
其間雖有廢毀無存者亦不隨爲湮沒也後之
登臨者睹其蹟思其人又豈特廣聞見資遊覽
已哉爰作古蹟志而書院則另爲一編示獨重
也其不因古而創建者標曰新建附紀于後以
告來茲云

六閩碑在山左高磴鐫石壁上凡七十七字

張世南遊宦紀聞曰何賢良名致字子一嘉定
壬申遊南嶽至祝融峯下按山志禹碑在岫巖

山詢樵者謂採樵其上見石壁間有數十字何
俾之前導過隱眞屏復渡一二小澗攀蘿捫葛
至碑所爲苔蘚所封讀之皆古篆五十餘字俱
難識字高濶約五寸許取隨行市曆模之歸旅
舍湊成本何過長沙以一獻連帥曹彥約并柳
子厚所作書般若和尚第二碑以一揭坐右自
爲寶玩曹甚喜牒衡山令搜訪令報云柳碑在
上封寺去冬雪多凍裂禹碑自昔人罕見之反
疑何取之它處以誑曹何乃摹刻於嶽麓久之

沒於蔡莽不見嘉靖乙未從石壁間搜獲流傳
海內遂稱神物云

舊志禹碑山圖說 按碑之奇異隱見詳之韓
劉諸詩詞張光叔紀聞惟是何子一宋嘉定五
年得之山頂日久蕪沒幾四百年至本朝嘉靖
九年太守潘公鑑剔土榻傳朝野始獲快睹虞
夏之書三十年太守張公西銘覆之以亭崇禎
三年兵道石公維嶽重修亭臺園以石牆南北
設門司啟閉行且傳千萬世不朽矣碑左有神

禹拖船埧稍南數級下赫曦臺舊址考文公靈
谷山記曰余名嶽麓山頂曰赫曦臺張伯和爲
大書甚壯麗後廢孫太守復建一亭於山下而
今以祠道鄉舊址改建爲高明亭矣

李邕麓山寺碑在嶽麓書院右世稱三絕碑以邕
撰文并書及江夏黃仙鶴刻或云仙鶴卽邕托
名也至今摹傳碑後米芾鐫題十餘字云襄陽
米芾同廣惠道人來元豐庚申元日明知府錢
澍砌亭覆之

四絕堂在道林寺側李唐馬氏建以沈傳師裴休
筆札宋之間杜甫篇章爲四絕宋蔣之奇作記
以爲遺歐陽詢而錄裴置韓愈而取宋未然乃
詮次高下沈書一詢書二杜詩三韓詩四又米
芾寶章待訪錄曰唐禮部尙書沈傳師書道林
詩在道林寺四絕堂以杉板薄畧布粉不蓋紋
故歲久不脫裴休書杜甫詩只存一甫字某嘗
爲杜板行以紀其事沈碑某官至潭借留書齋
半歲榻得其石本爲模石僧希白務於勁快多

敗落筆端直無復縹緲縈回飛動之勢又曰歐陽詢書道林寺碑筆力險勁勾勒而成有刻板本今俱不可得而見矣

吹香亭簷簷谷上仙巢鍾尙書建宋理宗親書仙巢吹香亭五字

忠孝廉節四大字宋朱晦菴手書留於尊經閣

禹碑亭在山左絕頂明嘉靖三十年郡守張公西銘創建崇禎三年兵道石公維嶽重修後盡毀圯康熙二十六年藩伯黃公震性捐貲建復

有記

射蛟臺在抱黃洞側晉時德潤門外有白鶴觀觀
有高樓與麓山抱黃洞相對起洞有妖鱗吐舌
爲橋奮鬣爲仗翼角爲天門熠目爲炬作聲爲
八音舞歲七月十五夜飛矚樓上羽流被惑以
爲導引昇仙歲次一人齋戒以俟其徒又醮而
拜送之陶桓公鎮長沙弗信引弓矢射其炬卽
時粹滅灑血如雨次日踪跡得之鱗斃於洞剖
其腹人骨羽冠斗許俗因呼曰鱗洞後人建臺

誦其功名射蛟

杉菴嶽麓山陶侃種杉結菴後菴廢杉存古巖可
愛往猶及見之今且爲兵卒伐盡矣

赫曦臺嶽麓山上文公雲谷山記曰余名嶽麓山
頂曰赫曦張伯和父爲大書臺上懸崖有篆字
數十隱見不明嘉靖戊子知府孫存建亭

道鄉臺嶽麓寺畔宋鄒浩號道鄉謫衡過長沙寄
臣溫益下逐客令不容風雨渡湘嶽麓山僧列
炬迎之後張栻爲築臺朱熹刻石曰道鄉以表

焉萬曆丁巳學道鄒志隆改赫曦山下建屋奉
祀久廢新建

風雩亭在嶽麓書院南宋劉珙建爲門人游息之
所今廢

飲馬池嶽麓山前宋朱張講學時從游者衆與馬
飲水欲盡俗呼應塘

諭苗臺書院右朱文公諭猗處遺址尙存

百泉軒在曲水上嶽麓書院左朱張二公建元吳
澄有記今廢

山齋劉珙建嶽麓山下今廢

濯纓池在百泉軒下宋安撫劉珙建

清風橋在清風峽上

詠歸橋在梅堤下橋下爲濯纓池宋安撫劉琪建
船齋劉琪建巨艦於江以待學者往來今廢

道中庸亭在朱張祠上朱文公題額舊址久廢

康熙二十六年 撫院丁公思孔重建

極高明亭在禹碑右稍下一嶺朱文公題額舊址

久廢 康熙戊申 撫部周公召南建復尋毀

于兵丁卯 撫院丁公思孔重建

四箴亭在聖殿後高阜上宋朱張時建明天啟推

官林正亭重修石刻程明道視聽言動四箴中
刻明世宗敬一箴崇禎末年兵毀 康熙戊申
撫部周公召南建復旋毀於兵丁卯 撫院丁
公思孔重修

翠微亭在江邊天馬山上帆檣城郭一目千里景
色最曠朱文公題額舊址久廢 康熙丁卯
撫院丁公思孔重建

擬蘭亭在聖殿右引水爲流觴曲水寧鄉陶汝鼐
題額

汲泉亭在擬蘭亭北古井一泓可鑑鬚髮內有明

顧璣詩刻

新建

御書樓在聖殿右康熙戊辰 撫院丁公思孔議建
并有碑記其鳩工庀材實郡丞趙寧成其志焉
丁大中丞講堂在諸賢祠左康熙戊辰郡丞趙寧
建

自卑亭在書院達江道右康熙戊辰郡丞趙寧創

建并名有記

其詔係掌院車
敏州先生所書

諸賢祠在書院左康熙丙寅建倣嵩陽書院舊制
也

寺觀

寓內名山多稱福地浮圖老子之宮徃徃在焉自秦漢之求仙不効隋梁之奉佛無功二氏若無解於譏斥矣然而華陰經世頓殘識人其相資固在深山大澤之間也使今麓山復有禁足道士之玄論高僧齊已之詩囊禪宗範老之文字雖昌黎不能不傾倒於大顛柳州不能不纏綿於元子矣而况藥圃花關餐英擷秀溪橋松梵策倦驅塵夫非讀書樂道者之一助歟正不必以錯雜書院爲嫌

也故紀晉唐以來寺觀附於簡末俾各有考焉

寺

嶽麓寺在風雪山亭右西晉太始四年創建歷代住持禪燈不替昔稱長沙第一道場唐隋以前塔廟尤盛詳李邕麓山寺碑記中以後修葺年月多無攷至國朝康熙十年住持檀禪師重修旋毀于兵二十年嗣法燈禪師建復有記道林寺在書院山左隋唐爲律院宋改禪自圓悟雪岩住持宗風大振旁有石浴池五代馬殷

建四絕堂於其地朱蔣穎叔有記久廢 今果
如禪德於順治戊戌重開漸次興建成鉅觀
南臺寺舊在寂音泉上唐道俊禪師道場號爲
水西南臺皇祐間廢爲律後洪覺範自鹿苑移
居於此復成叢席傍有明白菴故址見僧寶傳
今廢

西林寺

舊在

書院右古有清窩堂廓然亭久廢上

有雨花臺磐石天然其五寺基規模弘敞今尚
可跡

景德寺唐宋相承制極壯麗覺範閱藏於此今廢

真身禪寺舊在鳳陽山前赤沙湖上覺範有待月

詩序今廢

香雨菴舊在西林寺右久廢而其菴址最幽遠

舍利塔在清澗陰之上隋文帝建僧以亂石砌

小浮屠屢經劫火巋然不墜覺範有記載石門

文字

附載

興化寺在玉屏山下潞灣市孔道旁負岫當江
山水拱抱與東岸鐵佛開佛諸刹氣勢遙應亦
麓支形勝之區寺廢沒久矣舊屬明吉府莊地
土人有能言其爲古興化者然舊志未載無所
考但據傳燈慈明禪師住潭州興化後住福巖
示衆云住興化時只見興化家風迎來送去門
連城市車馬駢填漁唱瀟湘猿啼嶽麓絲竹歌
謠時時入耳等句則髣髴其地未遠也近年雪
照禪德來自荆南偶然剪棘遂成精廬隨宣教

化高人善友多相游從以此卜時節臻興剎等
建處卽成勝境今興化亦何必非古興化耶
水陸寺橘洲尾元濟應禪師開明末燬於兵
順治甲午住持僧募眾重建

觀

古雪觀在舊碧虛山右地極清遯真仙客所居然
觀自宋已不復觀後遂無修復者

萬壽宮抱黃洞下久廢

崇眞觀在古萬壽宮後卽跛仙隱處有南山七十

二唯喜洞眞墟之咏崇眞之名以其冲舉故云
今久廢

雲麓宮

在雲

麓峯上卽洞虛福地道士金守分募

建石柱鐵瓦祀玄帝梓潼君天師後一殿祀三
清外有五嶽殿天妃殿下有拜嶽石又有法華
塔在宮後兩山中履之空洞有聲曰步虛嶺俗
呼響鼓嶺嶽麓彌嵩詩曰磴道盤空望赤城玄
都初覺步虛聲萋萋雲外隨人足響鼓應知不
浪名 康熙初兵憲張公璿重新之

疆域

都省郡縣之志疆域所以分限界表道里也嶽
麓雖僅衡之一峰而綿亘蜿蜒亦自有此疆彼
界詎可以其微而畧之乎爰本舊志再加攷較
著之于編其土產津渡悉附之亦舊志也

嶽麓疆界舊碑所載上至稍州港下至市港前抵
江後抵山明正德初年清界左據道林坪極北
而止右據拜嶽臺樅山坪嶺盡而止前據橫山
大江後據峻峰厭土黃壤厭產薇蕨草惟天

厥木惟喬周廻凡二十里自山巔至書院凡五里自書院至大江凡三里江濶七里三分自長沙往者從霽官古渡一里達橘洲三里至書院從大西門五里達滌灣市又四里至書院從上關三里達漁灣市又三里有奇至書院

長沙府嶽麓志卷之三

郡丞山陰趙

書院

三代設教自國學而下至于閭黨莫不有學蓋
明倫敦化不厭其詳且密也漢唐以來天下郡
縣各設黌宮士之試爲弟子員者乃得遊之而
閭黨之學則聽人自爲師家自爲訓非不道一
風同也功名之路顯則性道之途微此唐宋諸
儒殷勤弘道者所以有書院之興而與黌宮相

補助乎天下四大書院獨嶽麓居首宋真宗時
頒賜中秘書立三舍法召見山長拜官賜恩其
後朱張兩大儒同集此地後先主教學徒千餘
與馬之眾至飲池水立竭一時有瀟湘洙泗之
目焉其所以講明道學成就人才者詎不盛哉
目今

聖天子重道崇儒媿休三代 丁大中丞以名臣宿
學來爲開府下車之後首隆教化日進諸生于
節鉞之下而訓誨之復又眷念嶽麓書院捐俸

營葺煥然一新益徵七郡二州之士肄業其中
既資其膏火廩餼復爲置田以垂久遠安撫休
風庶幾再覲且疏請於

朝賜額頒經一如宋咸平紹熙故事多士之蒸化蔚
起者行將本性道爲經濟以拜獻

彤庭賡歌喜起焉其爲造就豈特一郡一邑已哉麓
以岳霽而岳麓更以書院重山川之秀固與人
文相彪炳也若夫沿革年表以及有關於書院
者或仍舊志或稍增損具編于後使覽者知所

攷云

書院沿革

舊志

夫山川奇異與人文互相映發嶽麓溯衡襟湘
其高華清潁之氣每足發聖賢立輿而啟謁方
來故自神禹開疆以來如陶侃馬燧裴休杜甫
沈傳師劉長卿輩開舍結廬雲蒸星燦特以結
構不經公府類聚不專師門是以有傳弗傳耳
至宋開寶郡守朱公始掀建書院以待四方學
者教化于是大行歷咸平中李公允則請以御

書藏山長周式且以行義著真宗召見拜國子
監簿賜對衣鞍馬詔使歸院主教賜嶽麓書院
之額且給以中秘書於是書院之盛遂甲于天
下不虞南渡竟以兵火廢也乾道改元湖南安
撫劉珙復創新院爲屋五十楹內設禮殿肖聖
賢像加藏書閣山齋於堂北建風雪亭於南前
有濯清池咏歸橋梅柳堤臨江有船齋桴橋延
請張南軒主教事越三年朱晦菴聞南軒得胡
氏之學如長沙訪焉手書忠孝廉節四大字於

堂論中庸之義彌月玆赫曦臺於山頂淳熙末
直徽猷閣潘疇繼修之以教授顧杞兼山長南
軒門人吳獵稱堂長未幾復廢矣紹熙五年晦
菴安撫湖南興學嶽麓更建書院於爽塏之地
前列禮殿泮池後有百泉軒堂室二層約百間
臨江建湘西精舍更置田五十頃聘醴陵貢生
黎貴臣充講書執事又別置額外學生十員以
處四方遊學之士依州學例日破米一升四合
錢六十文學者雲集至千餘人日俟公餘質所

疑論說不倦時有諺云道林三百眾書院一千
徒一時輿馬之眾飲池水立涸風範所垂抑何
速且盛也傳九十餘年運使吳子良辟歐陽守
道爲山長稍爲興復德佑燬於兵迨元至元郡
人劉必大重建之延佑劉安仁爲郡別駕更撤
而新殿齋堂門悉如舊制左增諸賢祠右修百
泉軒又未幾燬於兵基臺故在而敗屋頽垣隱
見荒莽間遺址田土大半爲僧卒勢家所據且
碎其碑記越百五十年迄國朝成化太守錢澍

因元舊址重興之尋屬邱墟弘治通守陳銅覓
斷碑於汚蔓仍從舊院基剪闢荒榛創屋數楹
列誠明敬義二齋甃石數級上爲講堂北上特
祠祀朱張未久鋼以憂去且卒通守李錫司李
彭琢復山巔建高明亭仍置田供祀事以成陳
志二守楊茂元仍復尊經閣於杉菴舊址刻紫
陽遺蹟置經史廣訓教九年太守王珣協力表
章備所未盡啟請善化訓葉性爲山長正德守
道吳世忠習堪輿謂風水背戾更向置新殿改

路隨水道縈繞出山口置田百畝誨諸生以學
庸通旨御史翁理實成之學道陳鳳梧以攸人
陳諭領書院事集郡邑學行純篤生肄業著大
學講義湖南道學淵源錄而學道張邦奇繼襄
之人文彬彬蔚起亦斯文之一大快也頽廢二
十年餘爲嘉靖六年太守王秉良於舊院前建
成德堂尊經閣後建東西講堂延賓集賢二館
工未就而去太守孫存卒成之名其齋曰誠明
敬義日新時習號舍曰天地人智仁勇闢三門

於堂外題曰嶽麓書院厨湏器物具備共置田
一千四百四十九畝召郡邑生卒業復請賜書
置山長如白鹿洞例又請以御製敬一諸箴賜
制可學道郭登庸改成德堂曰靜一太守季本
重修流盃曲水亭置田百四十畝時顧中丞取
郡邑生學習武昌公遂進諸生於嶽麓日給米
二升請郡人太守熊宇主教事明年中式者十
餘人又足徵數君子振起之功也二守林華外
增食田爲文招孝廉及三庠諸生卒業給餼浸

沒至四十四年齋舍僅存二三錦堂僅存其左
司李翟台仍修葺焉及萬曆間巡道李天植殿
元張元汴以講學僅修之太守吳道行合書院
聖殿而重修之縣尹唐源因其敝陋而鼎新之
狀而號舍齋堂亦猶之乎昔也嗣是縣尹潘之
楫張明憲司李林正亭先後協謀以圖襄此役
顧無如時絀費繁何崇正二年縣尹黃承中奉
按臺宋景雲檄亟力特建邇今規制似少讓古
昔狀而盛舉相承斯文不墜考書院之興廢此

其大都焉若夫歷來當路名賢增補亭坊振飾
櫟垣姑遵舊志詳之年表中後之生斯宦斯者
留心文物振拔中興復見古初勝蹟令經世出
世之名流翹瞻雲集於以藏修游息亦末季一
甚盛事也爰提沿革之概於以俟稽古之君子
採焉

書院興廢年表

宋太祖開寶九年州守朱洞始創書院其議倡首
彭城劉整陸川王簿孫邁記 無攷

真宗咸平四年三月知州李九則請以國子監經
籍賜建湘西書院

祥符八年召見山長周式拜國子監簿

高宗紹興元年安撫建安劉珙屬州學教授金華
邵穎建復書院張南軒記

淳熙十五年直徽猷閣潘疇繼修書院陳止齋記

光宗紹熙五年朱晦菴安撫湖南更建爽塏之地
理宗淳佑十年運使吳子良辟歐陽守道爲山長
恭宗德佑二年春正月元阿里海牙兵燬書院

元世祖至元二年三年郡人學正劉必大重建書

院奉訓大夫朱渤記無攷

仁宗延佑元年郡別駕璵陵劉安仁以善化主簿

潘必大重建書院吳草廬記

順帝至正末燬於兵

明憲宗成化五年知府金壇錢澍重興書院尋燬

孝宗弘治七年通判鄞縣陳綱再建通判四會李
錫推官吉水彭琢復亭置田

九年知府四明王瑄同知鄞縣楊茂元協力重修
書院郡人學士李東陽記

十八年都指揮楊溥建大成殿

武宗正德二年守道叅議撫州吳世忠更書院向
扞大成殿於左改道路置食田三年學道陳鳳
梧以攸人陳論充山長

世宗嘉靖四年同知嚴陵俞夔斲石坊於江岸

五年學道咸宜許宗魯知府龍溪楊表改舊院講
堂爲六君子堂都憲嶺南黃衷記

六年知府西充王秉良建成德堂於舊院前增堂
館置田工未就而去

七年知府葵州孫存卒成之共置田千餘畝復聘
陳論爲山長未至

九年婺源潘鎰增敬一亭得禹碑於山頂

學道郭登庸改成德堂曰靜一

十八年知府季本委義民楊秉賢徐廷玉等二十

人分任修葺自大成殿至號舍

秋七月清出楊受屋佔禹蹟蹊官道卽令拆去
委義民黃栢捐俸立坊曰禹蹟蹊

二十年同知莆田林華集孝廉諸生肄業

三十八年推府吳人徐熿書正脈二字於朱張祠
三十九年知府濱州張西銘修禹碑亭

四十四年推官涇縣翟台重新書院知府蜀人蔣
弘德共成之郡人布政董策記

穆宗隆慶二年巡道嘉興卜相改高明亭爲翠微

亭砌朱張祠起至禹碑石路

三年知府成都高文薦重修建倉二間六君子堂
前

神宗萬厯十一年巡道廣德李天植重修書院

十八年知府濱州吳道行合書院聖廟鼎建

按院甘仕价檄府委湘陰縣丞俞堯中鼎新朱
張祠巡道曾如春記

二十一年知府吳復修殿堂亭閣砌岫巖詩碑亭
二十二年巡道蘭谿徐學聚建聖神遺蹟坊於禹

碑亭

三十九年知縣錢塘唐源鼎新書院聖廟推官饒
州陳大繡助修吉州鄒元標記

四十年知縣瓊山潘之楫修聖殿講堂重新火燬
之號舍

四十四年學道常州鄒志隆推官蘇州甯繩武知
縣潘之楫建道鄉臺於赫曦臺舊址置田令僧
人本空奉祀

熹宗天啟元年知縣湖州張明憲修尊經閣靜一

堂

四年推官福清林正亨修文廟四箴亭

崇正元年知府廣州王命卿重修文廟

二年知縣安岳黃承中增修書院復奉按臺宋景雲檄修聖殿墻垣門坊郡人李騰芳記

三年兵道灤洲石維嶽增建石亭於禹碑

十六年學道高世泰助長庠生王昌祚重建書院

皇清

康熙八年偏撫部院周召南重建書院文廟靜一

堂六君子堂擬蘭翠微等事有記尋燬

康熙二十四年偏撫都院廣益丁思孔重修聖廟
書院新齋祠舍煥然如舊知府蘇佳嗣郡丞趙
益通判王駿董其事遂安毛際可有記

二十六年偏撫丁思孔增建 御書樓重修極高
明道中庸翠微道并諸亭郡丞趙益董其事又
增建 文昌祠講堂自卑亭

廟祀

郡縣有學矣書院復

廟祀不近數乎曰祭菜示敬始教之道也時術之地觀感存焉何謂數乎故雖制不脩于費官而薦享有處儼恪爰生亦足以嚴敬業之心矣若夫朱張之別祀六君子之崇祠旣崇道學不忘有功從書院也亦可以風矣

舊志聖廟圖說

宋初僅有書院至乾道時劉安撫於書院前始

叛禮殿中肖闕里聖賢像列繪七十子前爲泮池苑門櫺星門自是晦菴先生更建書院如舊制而禮殿則五間也德佑燬於兵延佑劉別駕重建一如舊制各尊以王公號元末復燬於兵國朝成化錢郡守僅建禮殿繪聖賢像尋頽廢弘治間楊都閫特建大成殿於舊院前正德吳守道改之山左仍繪像殿後建明倫堂前增泮池儀門櫺星門翁直指建泮橋濯纓洗心亭於殿前而聖廟始嵬狀有崑地矣嘉靖年詔去王

公號太守潘公增敬一碑亭於明倫堂舊址今
改爲四箴亭翟司李繼修之萬厯吳太守鼎新
聖廟匾曰聖道中天李按臺立萬代瞻仰坊於
大成殿崇正王太守黃卿達合力重新黃縣尹
奉宋按臺檄新聖殿戟門墻垣丹堊錯陳宮墻
炳煥茂林清泉兩雨映帶足以妥聖靈而壯大
觀矣

舊志朱張祠圖說

元時別駕劉公以朱張合祀朱郡守周山長劉

安撫額曰諸賢祠尋燬於兵本朝成化郡守錢始特祀朱張於殿後堂而繪之像通守陳公名曰崇道嘉靖間以木主易像吳人徐巖泉匾以正脉萬厯廿按臺檄府鼎新祠宇太守吳公建坊曰繼往開來移正脉字增以斯文正脉天啟林司李重修建之右豎有名人石刻近北孫太守所建赫曦山下亭四十四年縣尹潘建亭祀道鄉先生轉磴道百級上則道中庸亭也

舊志六君子堂

夫六君子之祀謂其有功於斯文也據舊志謂
宜祀者不止六君子蓋以宋亡而書院廢矣元
之重創則郡人學正劉必大郡別駕劉安仁元
經兵火而書院又廢矣明之重創則郡守錢澍
先後興教置田贍士肄業則郡守王秉良孫存
潘鎰季本特建聖殿則指揮楊溥功俱不在六
君子下而祠典缺如今特著之篇首以志表揚
若嘉靖以來者不盡書也至萬厯郡守吳虛菴
又增塑像于祠而亦未列于祠矣

朱子書院教條

父子有親君臣有義夫婦有別長幼有序朋友有
信右五教之目堯舜使契爲司徒敬敷五教卽
此是也學者學此而已其所以爲學之序亦有
五焉具列於左

博學之審問之慎思之明辨之篤行之

右爲學之事學問思辨四者所以窮理也若夫
篤行之事則其修身以至於處事接物亦各有
要具列于左

言忠信行篤敬懲忿窒慾遷善改過

右修身之要

正其誼不謀其利明其道不計其功

右處事之要

己所不欲勿施於人行有不得反求諸己

右接物之要

熹切觀古昔聖賢所以教人爲學之意莫非講明義理以修其身朕後推己及人非徒欲其務記覽爲詞章以釣聲名取利祿而已今之爲學者旣反

是矣狀聖賢所以教人之法具存於經有志之士
固當熟讀而問辨之苟知理之當狀而責其身以
必狀則夫規矩禁防之具豈待他人設之而後有
所持循哉近世於學有規其待學者已爲淺矣而
其爲法又未必古人之意也故今不復施於此堂
而特取此聖賢所以教人爲學之大端條列於左
而揭之楣間諸君相與講明遵守而責之於身焉
則夫思慮云爲之際其所以戒謹恐懼者必有嚴
於彼者矣其有不狀而或出於禁防之外則彼所

謂規者必將取之固不得爲畧也諸君其念之哉

射圃書器

按明時各省鄉學前擇地爲射圃士子竝令習射此通制也若嶽麓之有射圃則創自正德年學使陳公鳳梧以書院亦有

聖宮因規倣學制而爲之觀德較藝亦造就人才之盛心未可與亭圃俱沒也若夫所置弓矢候朴鐘鼓琴瑟之禮器與經史典冊之藏書範銅之供器引削之尊俎几案陳設之御貝莫不有數今雖空文無煩臚列而其人其事皆有嘉德存舊志紀

載之言亦足以垂考覽矣

舊志射圃圖說

夫男子生而懸弧射矢古人自八歲入小學卽教以射藝之文而使知夫叅連之法攷成周時士在庠序者有賓客之事則以射有祭祀之事則以射有歲貢於王則以射是射固男子所有事也文以觀德武以勸亂合文武之道而一之者所以入而相出而將斯無有不能射者蓋自射禮廢文武分而天下無全材矣我國家稽古

興化凡秀民之育於庠序者竝令習射至正德
初督學廬陵陳鳳梧四明張邦奇俱令於嶽麓
相地興射圃備弓矢時山長陳論衛使楊溥遂
相度之爲圃爲亭儲器數以待學者肄習此匪
直恣嬉遊角勝負一比耦之爲沾匕也蓋經文
緯武古人之意深遠矣近奉憲約凡衡文事竣
仍於各學射圃考較射藝而章縫博袖竟以虛
文視也又奚問嶽麓館宇多鞠爲蕪莽哉

舊志書籍紀

接宋真宗咸平四年州守李九則請頒九經御
書藏於龍書院祥符八年山長周式請增給中
秘書旋遭兵燹朱晦菴復乞賜九經御書踰三
百年國朝同知楊茂元置五經四書性理諸大
全嘉靖七年知府孫存復請賜書置山長今皆
廢佚無聞矣

孤鶴

明正德間學使陳鳳梧有湖南道學淵源錄書錄
不傳攸人陳論纂岳麓志引真西山之言而以道
統派系次於書院之後豈非以湘岳鍾霧道學斯
盛而後之游息其地者學聖賢之學當繼先儒之
志哉西山之言曰二程之學龜山得之而南傳之
豫章羅氏羅傳之延平李氏李傳之晦菴朱氏此
一派也上蔡傳之武彖胡氏胡傳其子五峯五峯
傳之南軒張氏此又一派也寧按二程之學得之
濂溪濂溪道州人也五峯南軒授受亦在湖南而

考亭又講學岳麓最久他如龜山之知瀏陽西山
了翁公燭之知判潭州明張元忭王公喬之主講
岳麓俱皆道學名臣流芳南楚朕則湖南道統之
說詎不信哉今採先儒列傳編次書院之後而凡
山長六君子以及遷謫三公諸賢執事郡守俱得
附錄使見者聞者知所景仰亦知嶽麓之志有開
道化非漫爲紀載也彼風梧之書雖不可見所謂
道學淵源者大略不具是哉

先儒列傳

周公敦願字茂叔宋道州營道人原名敦實避英宗舊諱改焉以舅龍圖閣學士鄭向任爲分寧主簿調南安軍司理叅軍轉運使王達薦移郴州桂陽令郡守李初平知茂叔賢不以屬吏遇之嘗聞茂叔論學嘆曰吾欲讀書何如茂叔曰公老無及矣請得爲公言之初平逐日聽茂叔語二年果有得熙寧初知郴州趙抃及呂公著薦爲廣東轉運判官提點刑獄以洗冤澤物爲已任行部不憚勞

苦雖瘴癘險遠亦緩視徐按以疾求知南康軍因
家廬山蓮花峰下前有溪合於湓江取營道所居
濂溪以名之抃再鎮蜀將奏用之未及而卒年五
十七諡議曰先生博學力行會道有元脉絡貫通
上接洙泗下逮河洛以元易名庶幾百世之下知
孟氏之後觀聖道者必自濂溪始掾南安時程珌
通判軍事視其氣貌非常人與語知其爲學知道
也因與爲友使二子顥頤往受業焉茂叔每令人
尋孔顏樂處所樂何事二程之學源流乎此矣故

顯之言曰自再見周茂叔後吟風弄月以歸有吾
與點也之意伊川曰周茂叔窻前草不除問之云
與自家意思一般明道少年好獵旣見茂叔自謂
無此好矣茂叔曰何言之易也但此心潛隱未發
一日萌動復如前矣後十二年見獵者有喜心乃
知茂叔非虛言也蒲宗孟曰嘉祐己亥泛蜀江道
合陽與周君語三日三夜退而嘆曰世有斯人歟
黃廷堅曰春陵周茂叔人品甚高胸中灑落如光
風霽月臧格曰先生所得之奧不俟師傳匪由智

紫神交心契固已得其本統不朕嗜溪流之紺寒
愛庭草之交翠體夫子之無言窮顏淵之所以樂
是果何味而獨嚙嚙之耶晦菴曰濂溪在當時人
見其政事精絕則以爲宦業過人見其有山林之
志則以爲襟懷灑落有仙風道氣無有知其學者
惟程大中獨知之這老子所見如此宜其生兩程
也所著有太極圖說

楊公名時字立中宋將樂人稱龜山先生熙寧九
年中進士第時河南程明道與弟伊川講學於熙

豐之際河洛之士翕然師之龜山調官不赴以師
禮見明道於潁昌明道甚喜每言曰楊君最會得
容易其歸也明道目送之曰吾道南矣知瀏陽有
惠政龜山安於州縣未嘗求聞達而德望日重四
方之士多從之遊時天下多故有言於蔡京者以
爲事至此必敗宜引舊德老成置諸左右庶幾猶
可及時宰是之會有使高麗者國王問龜山安在
使回以聞蔡京乃召爲著作郎及面對奏曰堯舜
曰允執厥中孟子曰湯執中洪範曰皇建其有極

歷世聖人由斯道也李綱罷太學諸生伏闕上書
一時軍民集者數十萬吳敏乞用時以靖太學龜
山得召對欽宗乃以龜山兼國子祭酒言王安石
宜追奪王爵毀去配享之像使邪說淫詞不爲學
者之惑疏上安石遂降從祀之列士之習王氏學
取科第者上疏詆之龜山遂請閒高宗卽位除工
部侍郎陞對言自古帝王未有不以典學爲務已
而告老致政優游林泉以著書講學爲事龜山在
東郡所交皆天下士先達陳瓘鄒浩皆以師禮事

之暨渡江東南學者推爲程氏正宗與胡安國往來講論尤多龜山浮沉中外四十有七年晚居諫省僅九十日凡所列論皆切於世道後朱熹張栻之學得程氏之正其源委脈絡皆出於龜山卒年八十三諡文靖

胡公安國字康侯宋崇安人徙居長沙城南後提舉湖南學事公強學力行倡明絕學以聖人爲標的行誼爲課讀郡人感其化建書院於故居會有旨舉遺逸安國以永州王繪鄧璋應二人因老不

行安國請命之官以勸爲文學者零陵簿稱二人
黨范純仁且爲鄒浩所請託蔡京素惡安國與已
異得簿言大喜命湖南提舉及湖北推治之無驗
竟除名

胡公宏字仁仲稱五峰先生康侯季子也自幼志
於大道嘗見楊中立於京師又從侯仲良於荆門
而卒傳其父之學優游衡山下餘二十年玩心神
明不舍晝夜綜事物於一原貫古今於一息所著
書曰知信

張公栻字敬夫宋廣漢人生紹興二年隨父紫崖公以觀文殿大學士知潭州寓居城南聞衡山胡五峰得聖賢旨往師事焉五峯一見卽以孔門論仁親切之旨告之公益以聖賢自期學必先察義理公私之間而後窮理敬業作希顏錄歸築城南書院於妙高峯以居學者乾道三年朱子聞之如長沙訪問講中庸之義不能合者三晝夜晦菴稱其卓荦有見偕遊南嶽劉珙與復書院聘請主教仕終吏部侍郎所著有論孟太極圖說諸書卒塋

崑鄉諡曰宣

朱公熹號晦菴宋婺源人建炎四年庚戌九月十五生於延平尤溪之寓舍幼穎悟年十四學於胡籍劉白水劉屏山長勵志聖賢之學於舉子業初不經意紹興戊辰中進士任同安主簿歷四考罷歸年廿四受學李延平得道統之傳大要窮理致知反躬踐實居敬以成其終始乾道丁亥如長沙訪張南軒講學城南嶽麓每語學者觀孟子道性善及求放心兩章務收斂凝定以致克己求仁之

功紹熙癸丑除知潭州安撫屢辭不允甲寅二月
之任會猗獠侵屬郡公諭以禍福降之興學校明
教化更建書院爽塏之地屋舍百間食田五十頃
延山長主教事不獨長沙士子彬彬向學鄰郡生
至于人公日治郡事暇與諸生講論質疑瀟湘有
洙泗風家居二十年累遷煥章閣侍講所著易詩
四書啟蒙太極書西銘楚辭等集註韓文考伊洛
淵源等書年七十二卒贈太師謚曰文從祀孔廟
真公德秀字景元宋建之浦城人自少有志於學

登進士第以儒術飭吏宦遊所至惠政深洽累官
禮部侍郎直學士院因經筵侍上進曰此高考二
祖儲神燕閒之地仰瞻楹桷譬如二祖在上惟學
可以明心惟敬可以存心惟親君子可以維持此
心凡陳鯁言多類是守泉州日著心經自舜禹授
受以至六經四書諸大儒之言凡論心之說靡不
畢備嘉定十五年以寶謨閣待制兼安撫使知潭
州本廉仁公勤四字廟屬有湘亭諭屬詩請罷權
酷和糴諸弊政立惠民諸法覃心垂永尤樂育人

才以周程朱張之學勸勉士子是時講學雖廢而教化大行紹定間召爲戶部尙書入見以大學衍義進三乞辭祿卒謚文忠郡人特祠祀之

魏公了翁字華甫宋浦江人端平初以資政殿學士知潭州崇重道學先是孟宗禁僞學朱端功之降靖州湖湘江浙之士不遠千里負書從學乃著九經要義百卷訂定精密先儒所未有也後屢召入朝廷臣多忌之日乞歸田里不允遂有是命

李公燔朱建昌人由進士從朱熹學熹告以曾子

弘毅之語燭以名其齋積久往見熹熹嘉之凡諸
生未達者命先訪燭俟有所發乃爲折衷由襄陽
授改判潭州真西山爲帥府事悉以諮燭燭嘗曰
人不必待仕宦爲功業但隨力到處可以及物卽
功業也學者宗之謚文定

續傳

張公元性字子盡別號陽和明浙江山陰人本宋
相魏公後天性忠孝介狀不苟取與童丱時從父
太僕公京即卽物色諸縉紳臧否及朝政得失慨

朕以古大賢自許嘗讀朱子格致章覆卷思之嬰
疑已聞王文成良知之說乃灑朕有悟自是日究
心於此學矣旣舉於鄉念太僕公遠宦竟輟計偕
往省踰年乃歸嗣爲太僕公白事一歲而奔走南
北者三以里計者三萬餘是時年纔三十髮皤朕
盡白云嘉靖辛未成進士賜殿試第一授翰林修
撰初服官卽竭忠讜多所建白己充內書堂教習
懲時之弊特取忠鑒錄親爲條解又作訓忠諸吟
令歌之冀有所感悟尋陞左諭德充經筵講官啟

導盡職平時所孜孜者惟以講學爲急務學宗文
成而每病世之學文成者多事口耳特以力行矯
之嘗曰知善知惡是良知爲善去惡是格物此致
良知宗旨也又言朱陸之學本同一源後人妄以
意見分門戶滋生異議乃取朱子詩文摘其與文
成合者彙成一書曰朱子摘編書出而紛紛異同
之說渙然矣壬午皇嗣生齋警告楚中六王因上
匡廬浮沅湘入武義脩狀山水間所至輒偕同志
集聚講學遠近嚮嚮向風萬厯間兵憲李公天植

敦迎主講嶽麓士習翕然不變湖南正學絕而復
續云

王公喬齡明餘姚人王陽明先生高弟嘉靖中任
長沙兵憲以理學抒經濟臨政持大體敦尚風節
率三庠士講道嶽麓良知心訣多所發明稱理學
名臣

山長列傳

周君式宋湘陰人爲嶽麓山長以行義著祥符八年眞宗召見拜國子學主簿詔留講諸王宮式辭賜對衣鞍馬使歸教授增給秘書勅賜嶽麓書院名額

舊志以周奭作式而祀之謬合兩人事蹟爲一段考奭南軒門人去祥符白五十年今應改正

吳君獵字德夫號畏齋宋醴陵人乾道初從學南

軒傳熙間潘麟聘充嶽麓堂長登進士第光宗召
試守正字疏請覲重華宮以秘閣修撰知江陵擊
金人克四川安撫荆湖樊襄蜀人祀之著有畏齋
文集奏議十八卷

黎君貴臣字昭文宋醴陵人貢生受業朱子講明
道學士多宗之克嶽麓講書執事

彪君居正字德美號畏齋宋湘鄉人從胡文定父
子學講明經學不事進取爲嶽麓堂長人以彪夫
子稱之

歐陽君守道字公權淳佑進士運使吳子良聘爲
嶽麓山長發明孟子正人心之論學者陳敬時族
人歐陽新子必泰俱寓居焉

顧杞府教授潘疇聘充山長事實無考

陳論明攸邑諸生正德四年學道陳鳳梧以論志
趣高邁可與向學取爲山長作嶽麓書院志後貢
入國學嘉靖七年知府孫存復延爲山長論辭未
赴

葉君性福州人弘治中善化諭充養有道不以世

慮經心郡丞楊茂元聘克嶽麓書院山長及門之
徒彬彬焉

六君子列傳

朱公洞宋開寶中守潭州始創書院以待四方學者官至尙書世里無殍陳止齋記云朱守作書院五六十載之間教化大洽學者皆振匕雅黜行義修好庶幾於古爲吏者嶽麓書院之興實自洞始周式列傳見山長內

李公允則字垂範宋真宗時知潭州兼管幹湖南路巡簡兵甲公事興學嶽麓請頒九經御書勅馬氏暴斂有地稅牛稅枯骨稅茶稅公清除三稅勸

民墾田民餓以家資爲質於轉運使二次先賑後奏全活萬人

劉公珙字其父崇安人乾道元年知潭州兼湖南安撫以書院燬於兵力置興復爲屋五十楹養士千人請南軒王教事且告以古人爲己之學刻頌青沈之文於壁以示學者至討叛李金劉花三等誅之終資正殿大學士臨卒戒用浮屠軍民祠祀陳公綱字堅遠鄞縣人由舉人成化令黔陽建寶山書院宏治初判長沙訪朱張遺跡得醫院遺址遂捐俸治材建講堂齋舍特祠祀朱張三百年既

望之緒賴以興焉後以母憂去任卒於家

楊公茂元字志仁鄆縣人由進士宏治間山東副
使以忤權貴謫同知以詩書飾治以興起斯文爲
任加意書院表章紫陽遺跡鑄於石歷官州部侍
郎

附遷謫三公傳

鄒公浩字志完宋晉陵人少以道學行誼稱嘗從
伊川講學元豐五年進士哲宗除右正言以言事
落職徽宗立召爲中書舍人蔡京忌之再謫衡州
判道經長沙投宿嶽麓寺僧列炬迎士人方擬從
游論學知潭州溫益遽遣州督監將數卒夜出城
逼使登舟竟凌風絕江而去後朱張築臺於嶽麓
曰道鄉臺示仰止之思迄今發人感憤

王公守仁字伯安別號陽明明紹興餘姚人童子

時問塾師何爲第一等事塾師言讀書登第爾陽
明中不朕曰此未爲第一事其爲聖賢乎年二十
一舉於鄉徧讀晦菴書有所自得二十八成進士
上疏陳邊務擢刑部主事尋改兵部在京師專志
講學與湛甘泉定交嘗謂初志此學幾仆而興晚
得交甘泉而後吾志益堅毅然不可遏云累官至
僉都御史巡撫南贛汀漳平漳寇定宸濠之變封
新建伯宦跡所到門人數十相隨揮麈談道未嘗
以造次輟也先是正德間忤關瑾謫貴陽道經長

沙泛湘沅弔屈賈寓嶽麓爲朋徒斤斤講良知之
學是時朱張遺蹟久湮賴公過化有志之士復多
興起焉

長沙縣志稱陽明寓壽星觀將遊嶽麓不果
題詩觀壁而去與舊郡志所載不符當以郡
志爲正

鄒公元標字爾瞻明江西吉水人自束髮卽毅然
以綱常名教爲己任初舉進士抗疏論江陵廷杖
投荒忠直震於天下平居坦易接物藹然遇軍國

大故朝廷大議人才進退忠邪消長之故一語及
之意氣勃動不可遏在朝在野皆欲一炙其丰采
以爲榮得王文成格物之學獨心會於格其不正
而以歸於正之旨晚年造詣益深圭角盡化深以
矯激着意爲非熹宗登極由少宰晉總憲世方翹
望柄用忤權倖逐公去國過長沙寓嶽麓講學諸
名士從之游崇正朝錄慘禍諸賢論卹首被先生
謚忠介

賢執事傳

陳公鳳梧明廬陵人由進士正德年督楚學人文蔚起試長沙最稱得士會叅議吳公世忠按部徙置書院形勝公乃集郡邑純篤生肄業嶽麓以攸人陳論領書院事著大學講義湖南道學淵源錄屬論纂修麓志裁定精核麓之有志自公始

李公天植明廣德州人以吏科給事任兵憲釐弊舉廢恩威竝著惓惓興學維風季有督課敦延修撰張公元怵講學嶽麓惜陰兩書院至今理學昌明士感教澤

高公世泰字彙瞻明無錫人崇正辛巳由部郎衡
文三楚繩武忠憲公正學以爲教法特置濂溪書
院於會城徵集十五郡名雋肄業砥志賦四詩示
諸生提命宗旨過星沙會多士嶽麓山下誨迪深
切重書濂溪院詩留之麓山講堂長庠生王昌祚
捐家修復書院工弗能竟公嘉其績助貲贊成之
與吳愷論麓志當崇重書院識議卓然原書錄入
啟牒中

賢郡守傳

錢公澍明金壇人天順中自給事中權長沙知府
公正寬平修舉廢墜百度咸新捐修文廟建尊經
閣葺長沙諸忠賢祠留心文教成化五年慨然興
復嶽麓書院百數十年邱墟之地頓觀大觀厥功
偉矣

彭公琢明吉水人弘治中司理長沙廉惠有聲以
俸資入嶽麓書院置田養士復山巔極高明亭自
甘冰蘗終其身弗改名載一統志名宦中

孫公存明葵州人由禮部郎擢守長沙文章政事
竝優而清操特立留心學校會前守王公秉良爲
嶽麓增置尊經閣及講堂館舍工多未竣公卒成
之更置三齋六號舍闢三門益增拓餽田集諸生
卒業復請賜書置山長如白鹿洞例并請賜敬一
箴御製皆報可書院之盛振美一時

潘公鑑明婺源人嘉靖知荊州調長沙精明幹濟
聲振一時修郡志新學宮惓惓造士得禹碑於麓
山增敬一亭序刻性理三通蓋崇儒好古斯文羽

翼也

季公本號彭山明會稽人由進士考御史來守長沙蚤聞新建致良知之旨著書數百萬言重修嶽麓曲水亭增置書院田百四十畝廩餼諸生敦延郡人熊字主教事道風宦澤竝贈炙人口

翟公台字震川明涇縣人由進士任司理刻意興起斯文修嶽麓書院增食田備器具又清復城南院地士風大振

吳公道行號虛菴明濱州人歷任太守九年培養

人才鼎新兩書院集合屬之俊者肄業課藝屬教
諭彭宗旺廖自伸三教事月給廩餼人文大盛士
賢而貧者捐俸周之士民立祠志去思又塑像於
嶽麓六君子堂

興復公牒

潭州委教授置嶽麓書院牒 朱 熹

契勘本州州學之外復置嶽麓書院本爲有志之士不遠千里求師取友至於是邦者無所棲泊以爲優游肄業之地故前帥樞密忠肅劉公特因舊基復創新館延請故左師侍講張公先生往來其間使四方來學之士得以傳道授業解惑焉此意甚遠非世俗常見所到也而比年以來師道陵夷講論廢息士民不振議者惜之當職叨冒假守蒙

被訓詞深以誦學教人之務爲寄願恨庸鄙弗克
奉承到官兩月又因簿書未能一往謁殿升堂延
見諸生詢考所合罷行事件庶革流弊以還舊規
除已請到醴陵黎君貢士充講書執事與學錄鄭
貢士同行措置外今議別置額外生十員以處四
方遊學之士依州學則例日破米一升四合錢六
十文更不補試聽候當職考察搜訪徑行撥入者
庶幾有以上廣聖朝教育人才之意凡使爲學者
知所當務不專在於區區課試之間實非小補牒

教授及帖書院照會施行仍請一回指揮若干人
排備齋舍几案床榻之屬并帖錢糧官於本州贍
學料次錢及書院學糧內通融支給須至行遣

興復書院劄

明 吳世忠

本道先據長沙衛指揮楊溥呈稱嶽麓書院年久
倒塌相應修理續據長沙府縣生員何鳳等呈稱
嶽麓書院風水背戾所以屢興屢廢今欲修理必
須畧移向址方可久長等因據此爲照修建書院
乃斯文盛事當差風水人前去書院踏看山脉如

果風水背莫應與那改隨將淫祠拆卸一應木石
磚瓦搬運赴院一面添修外仍倡率府衛縣官員
師生隨力佐助約銀二三百餘兩隨發長沙府衛
委官收支買辦木料顧募夫匠不許假此輕動在
官錢糧一面責令各匠將新舊木料豎崇道祠尊
經閣大成殿講堂儀門兩齋兩廡號房仍於儀門
前鑿砌泮池池外爲櫺星門稍完改其路隨水道
縈繞而出山口移建牌坊五間又稍完相其地位
并立風雩亭詠歸橋以上務在完整承委官員務

要稟機而行或有夫匠頑梗別有所見俱參酌經
自施行

呈詞

公請 題達嶽麓書院呈

康熙八年

陶之典稿

爲恭逢 聖代崇儒建復嶽麓書院懇賜轉詳照
舊 題達以彰文教之盛事竊惟觀人文以化成
實闢氣運樂英才而教育必藉振興何幸遭逢敢
虛盛事長沙古稱文獻之地人知嚮學士習尊經
而大魁名臣多在南宋當時有四大書院以嶽麓

爲冠蓋自宋初尙書朱公洞肇建

孔廟講堂齋舍厥制咸備嗣是賢者相繼代有規模其修舉也宋則有劉安撫潘直閣元則有劉別駕明則有錢郡守陳郡倅楊郡丞諸當事之經營其講學也宋則有朱張兩夫子明則有王文成張殷元諸大儒之教澤寓內嚮風化同鄒魯然代經守臣奏請勅賜院額頒賜經書敦聘山長堂長以春秋致祭

先師蠲糧田以餼士廣試額以作人筦鑰司存規

垂永久無何兵燹之後鞠爲荒榛南軒義利之辯
不聞考亭安撫之賢難邁遂致科名替落敦學衰
微幸際

熙朝爭思祓濯緣遇 本撫部憲宗師濂閩合轍

教養兼施學廢墜而復興士湔磨而知貴賢科蔚
起義塾觀型因而感動羣情公請重興書院合七
郡之士紳輸助荷同時之師率贊成董事得人葺
年竣役如 廟庭講院齋舍亭臺規制悉復舊觀
吏民絕無煩擾除礮石請記外伏逢

今上冲齡天縱好學崇儒得毋仰契

聖心正可循行奏達懇乞轉詳比照宋時事例俯賜
題請載爲成憲俾美軼前人益煥中天之聖道功
垂奕禩永昭盛世之儒風斯文幸甚地方幸甚

請 丁大中丞誌序詳文

湖廣長沙府清軍同知加二十二級趙寧爲嶽麓
誌書將成祈請鴻篇弁首以光盛典以垂不朽事
竊念書院一誌上載朱張紹述之淵源下及名彦
後先之讚詠單詞隻語理趣無窮短賦長歌風華
備瞻實爲繼在開來之要典維風範俗之徵音也
憲臺以當代儒臣爲斯文領袖重念典籍廢興關
係士風隆替乃于捐修書院之外復爲緝續遺編
釐然成帙其實心上契聖心道統兼資治統者矣

但一理萬殊務期扼要同源異派咸望指歸則矣
憲臺之大序引言急宜冠諸部首啓迪愚蒙至於
公餘詩賦若得廣被縹緲則木難壓多寶之舟車
玉爲希世之秘所以羽翼先賢振興後學又屬
憲臺作人無已之至意也伏望早頒珠玉以便即
付棗梨事關大典非屬具文爲此申請伏乞照詳
施行

紫陽遺蹟題贊序畧

李宏

楊升元

長沙實朱子遊宦之地然其遺蹟問諸故老亦鮮有知其詳者若嶽麓書院亦其遺跡之一也吾友陳堅遠既重建之矣其後有隙地茂元構一閣度諸書榜曰尊經暨訖工乃考文公年譜遺事之有裨於長沙者命爲八題曰麓山講學衡岳同遊安撫湖南諭降洞獠更建書院節制虎軍考正禮儀錄旌忠節每題書年譜之文於首命工分繪爲圖而各爲之贊於後合而名之曰紫陽遺蹟既成以

授郡庠生楊釗陳大用使揭於閣之四壁冀夫登而覽之者興起其尊賢尚德之心而思讀其書以學其道是或風化之一功也此則繪圖之意序其端以自勵且爲吾潭士民勸

麓山講學

年譜云乾道三年八月如長沙訪南軒九月抵長沙留止兩月而行二先生講論之言無所考按南軒贈行詩曰超然會太極眼底無全牛聯菴答詩曰始知太極蘊要妙難名論則其往復而深相契

者太極之旨也又中和舊說序云予蚤從延平李先生學永喜怒哀樂之旨未達而先生沒聞張敬夫得衡山胡氏學往從而問焉是時范彥德侍行嘗言二先生論中庸之義三晝夜不能令其後先生卒更其說及攷之晦菴祭南軒云蓋有我所然而爾之所議又有始所共嚮而終悟其偏又有蚤所同擠而晚得其味蓋繳紛往返者凡十餘年末乃同歸而一致觀此則二先生之同道可知矣贊猗與嶽麓山翼書院二賢戾止審問明辨聖

言之秘天道之微始也未契終也同歸

南嶽同遊

年譜云十一月偕南軒登衡嶽至橋洲而別南軒
游衡唱酬序畧云杖往來湖湘夢寐衡嶽之勝亦
嘗寄跡其間獨未嘗登絕頂爲快也乾道丁亥新
安朱元晦訪余湘水之上將道南山以歸乃始爲
此游而三山林用中亦與焉

贊 南有衡嶽聯騎以過一張一弛載笑載歌孔
登泰山而小天下前聖後賢其揆一也

安撫湖南

年譜云紹熙四年十二月除湖南安撫辭五年正月再辭二月詔疾之任會猗獠侵擾屬郡恐其滋熾遂拜命四月啓行五月至鎮在途所次老稚扶攜來觀夾道填擁幾不可行長沙士子素知向學及鄰郡數百里間學者雲集先生誘誨不倦坐席不能容溢於戶外士俗勸動

贊 湖南雄鎮起公安撫戴白扶臨爭先快覩生徒雲集坐不能容三月之化百世之功

降諭獬獬

年譜云遣諭獬獬降之獬人蒲來矢出省地作過
或薦軍校田昇可用先生召問之以爲可招期以
某日俘以來昇卽以數十輩馳往取文書初若告
身者自隨諭以福禍來矢喜聽命遂并其妻子俘
以至官給冠帶引赦不誅

贊 蠢爾荆蠻稔惡衰兇曾是戈甲以俾率從晦
翁片言殽崩心革匪比於翁服此文德

重建書院

年譜云更建書院書院本樞密劉公舊規久廢先生擇士之淳實者往整復之別置額員以待不由課試而入者其廩給使僅與黽庠等後更建於爽塏之地規模一新焉

贊 嶽麓之山湘水之右書院聿新賢哉二守更建爽塏雲谷主人超前啓後於萬斯春

節制虎軍

年譜云奏飛虎軍本州節制從之先生申教令嚴武備以飛虎軍馬爲百姓害罷不能禁故有是請

贊 飛虎戎卒強梗孔多肆虐吾民莫敢誰何公
奏於朝聽我節制振揚威武迅掃宿弊

錄旌忠節

年譜云錄死節五人爲之立廟東晉王處仲之亂
湘州刺史譙閔王司馬承起兵討賊不克而死紹
興初金賊犯順通判潭州事孟彥卿趙民彥督兵
迎戰臨陣遇害城陷日將官劉玠兵官趙聿之罵
賊不屈而死五人皆以忠節沒王事而從前未有
廟乃於城隍廟內創立祠堂象五人并象其參佐

侍左右立位碑記其官職姓名奉祀如法後又請於朝廟額曰忠節

贊 東晉一人南宋有四箴以忠節歿於王事公錄之聞賜額褒旌四時奉祀慰死勵生

考正禮儀

年譜云考正太常所下釋奠禮儀申明指揮付學官遵行先是在潭州任內得請施行旣去官復格不下至是前太常博士詹居仁還爲少卿乃復取往年所被敕命下之本郡然吏文重複繁冗幾不

可讀先生召還奏事行有日矣適暮目眚乃力疾
躬爲鈎校刪剔爲數條以付州案仍移學官及屬
縣且關帥司并下巡內諸州僅畢而行

題道鄉臺遺蹟

遂安毛際可

道鄉臺者以鄒浩號道鄉而得名也浩以直諫謫
衡陽道經星沙守臣溫益下令逐客遂風雨夜渡
湘江山僧列炬迎之後張南軒爲之築臺而考亭
名曰道鄉刻石以記嗟夫方其流離奔竄幾以身
爲長物豈知千載下此臺反因是以傳耶蓋宋時
賢士大夫遷謫外郡一時承望風旨不許僦民舍
以居多方迫逐必使之無所容而後止若黃山谷
之在宜州竟至寢處戍樓風日不蔽以至於歿必

有厄之使朕者朕其時守臣之姓氏不傳獨所謂
溫益者怙恃權位所得幾何而名遂與此臺俱永
則小人亦有幸不幸焉吾願後之膺方州牧者其
亦知所鑒也哉

南軒遺蹟補

按紫陽遺蹟多守潭宦澤勒在麓庭至今猶可瞻
仰若南軒先生僑居此地特爲來學築城南書院
蔭嘉木澹清流樓閣軒亭之勝畢具不階事權而
能與紫陽互相建置教澤何勤也自城南廢而聲
響銷沉傳聞竝絕吁可念哉今獨城南十景兩公
所賦詩尙在披誦之使人企想慨然請自今以城
南遺蹟亦勒之麓山朱張祠中以永其傳可乎

舊志城南書院說畧

南軒先生爲宋名儒父紫巖紹興三十一年以
觀文殿大學士知潭州先生隨侍遂家焉乃卽
妙高峯之陽築城南書院以待來學者中建麗
澤堂書樓蒙軒月榭卷雲亭後爲高阜湘江橫
前嶽麓圭峯金牛谷山橘洲一覽俱下而木茂
泉清花香鳥韻城南佳勝此其最焉右多美竹
名琮琤谷引錫潭水濬湖名納湖中有採菱舟
聽雨舫號以十景南軒晦菴皆有題咏時當夜
讀蛙聲聒耳投硯禁之其聲頓息因以禁蛙名

池考格古論曰城南書院四大宇紫巖得意之
筆年久蕪廢勢家僧徒冒而有之建高峯寺於
阜上正德二年叅議吳世忠與陳鳳梧協謀
清復尋歸藩府嘉靖四十二年推官翟台建堂
五間於寺後萬歷六年復廢矣

舊志湘西書院說畧

朱渾士臣居學讀書爲重嶽麓書院外於湘江
兩岸復建湘西書院州學生試積分高等升湘
西書院生又分高等升嶽麓書院生渾人號爲
三學尋燬於兵火劉輔之重建傳至聯翁時托
王相使謙仲轉懇清臺新之語載劄子中

舊志惜陰書院說畧

耨城靈觀渡之左舊有陶桓公祠嘉靖四年知縣呂廷爵創爲惜陰書院塑公像於中從公惜陰意而規制不甚備四十二年推官翟台恢其制中爲明道堂五間左右貯器物堂前爲墀百步建亭於中曰洗心兩旁有池繞砌石欄曰禁蛙取南軒書院故事亭前有大門豎坊曰惜陰書院堂後建祠五間祀公神主以其像移置於廟後登高阜爲聚英樓憑虛四面足供眺望樓

後爲廣仁堂則多士所建以廣翟公之仁也左右隙地若干丈週圍牆垣從樓前分兩翼遷至大門共號舍六十間集諸生肄業其中堂左向嶽麓爲望嶽樓樓前爲望嶽亭亭左右有田數邱田之前爲塘西抵路北抵塍南抵吉府店後溝四圍俱有垣牆今悉頽淤而市民任意侵填爲己地矣樓右有小塘塘右有坪有倉五間賸租谷傍爲守者居焉外置田八百三十畝以贍來學者棹椅床橙各百副郡人李棠劉應峯各

有記至萬厯六年詔毀書院知府牛可麟力請
於上改爲陶公祠廢望嶽樓亭價入官士至今
感之十二年移真西山合祀更名陶真祠十五
年知府吳道行知縣陳一鑑重修戊子辛卯集
十三庠生肄業月給廩餼時登雋入侍者數十
人二十三年仍改爲陶公祠四十一年推官陳
大綱以長沙館驛傾頽改洗心亭爲二門毀聚
英樓廣仁堂木瓦助修堂祠爲公館毀號舍爲
隸卒房僅存門役三間諸生自修五間餘盡拆

去而磚瓦幾萬個竟散佚無存亦斯文之一大
厄也攷縣志弘治間有司以祠地頗廣析其半
與一孝廉爲居方釘匾額於門一夕大風碎匾
飛去且感異夢孝廉旋還之則公之靈驗矣而
今且以婦女僕從祿沓於祠左右陶公卽不苛
責之安神靈而振文學者固宜作如是觀乎

三書院之廢久矣吳志云所以存城南惜陰
者不欲異同舊志也夫果可以不存削則削
爾亦何嫌於異同哉攷城南書院創自宋張

魏公其後南軒晦菴兩夫子講學潭州或過
嶽麓或止城南蓋兩公往來游息之地是城
南與嶽麓原相表裏也時代更遷講堂化爲
僧舍學實荒矣明嘉靖間乃稍稍修舉教事
顧念麓在湘西風雨江濤期會恒不達而城
南故址不能更問之緇流其時當事乃卽陶
桓公祠拓爲書院以陶公運甃之語額曰惜
陰旣不墜陶公之祀而又於學者便焉是惜
陰蓋繼起之城南因嶽麓而有者也嗟乎前

賢用心之勤如此所謂終不可誼也烏可以
其制之久廢而并廢其名也哉若夫湘西精
舍原在嶽麓山下視麓庭若堂之有西偏家
之有別墅是又無煩於牽附之喋喋矣

餼田

四民各有常業而唯士不謀食當其發奮志學苟非素封安所咨業乎又况千里負笈勢不能裹糧此養士者所必留心於授餐之典也嶽麓書院創自宋初舊有餼田以贍生徒迨朱攷亭安撫潭州大興講誦增舍百間廣田至五十頃一時之士彬彬向化養教相資詎不信哉然爲歲旣久漸沒於豪右至明孫太守僅清復其什一合之諸當事新置自弘治至萬曆尙有田一千八百餘畝而季大

守林郡丞之增入不在數焉舊志紀載雖地名坐落非不班班詳明然世故變遷皆不可卒問矣茲蒙

丁大中丞重新書院特捐置田若干畝而士之輻輳者絃誦盈耳又豈非饘粥有資而後生徒可聚之一明驗耶茲書舊志備列餼田使夫繼起者留心作育或量捐增置或清復舊田悉于茲志有攷焉庶澤垂不朽而書院養教不至廢墜云

食田舊紀

道林寺前田三十畝外茶園一所每畝穀五斗共穀十五石

西林寺前田三十畝每畝租五斗共穀十五石牌坊邊大塘一口西林寺小塘五口屋基一所原額無糧業主廣慶外書院牆內田三畝今築爲西講堂赤家冲田二十七畝屋基蘭土所大塘一口糧三石五斗其田星散不一業主周通周志高報納租八石餘租除業主納糧

以上實在田共八十七畝

除糧納外

共穀三十八石

屬善化

二十都共銀八十二兩五錢弘治甲寅戊午等

年糧刑官彭琢李錫叅議吳世忠監生李歸受
共置

新增田地塘

碑亭山前十畝

四十畝七畝

內除一畝幫大門基牆外挑

破一畝

道林寺前十畝

大小二十五畝

以上實田十八畝每畝租六斗共穀十石八斗

原額開墾價銀二十兩業主黃安嘉靖丁亥知府王秉良置

書院牌坊前後塘下田十一畝五十五每畝租五斗

共穀五石五斗價八兩無糧道童蕭性庸買原無

糧前代徐家屋場二十畝大小四十三外乾塘三口水

圳一條茅屋三間每畝納租四斗共穀八石原開

荒田軍舍吳進古僧益鐸告出補開墾銀五兩

赫曦亭山下八十畝一百四十二塘三口屋基一所茶

五十斤價十四兩六錢業主黃安

以上實田六十八畝共穀三十五石八斗知府
孫存置

長沙衛後所軍黃廷用黃釗隱開懇善化土牆頭
坪上等處無糧田數多縣民李應秀首出除秀與
廷用共耕五十畝與二家辨納原科米一石六斗
五升外坪上小坵尾廷用住場四圍田一百零六
畝五分大小坵八共穀四十二石六斗屋場一所
大坵下二十二畝坵共穀八石八斗

楊八溝余家嘴五十九畝五分三坵共穀二十三

石八斗 鷄頭湖荷葉塘十畝 三納程原

以上共無糧田一百九十八畝 一百二十五畝 穀七

九石 一斗嘉靖戊子知府孫存中呈屯田道

請入書院

長沙衛左所軍陳友賢等父祖寄居嶽麓隱舊額

鴻門內二百五十畝 一百八十九畝 小塘五口糧無升合

賣與前所軍人譚玉每畝納穀五斗共穀一百二

十五石知府孫存清出以復書院

又查陳友智將連坂陸馬塘真人港鴻門外小塘

龍王井崎頭土南臺等處田六百六十畝私賣
與軍人譚玉指揮張清楊溥王政皆書院五十頃
數不能盡究俟後之君子攷焉

按朱張二先生置田千畝奈世遠人必多爲
家所隱嘉靖初奉撫按詳允本府問斷
沙縣絕民劉光徹沒入官田各地名坵畝號
開後

龍家冲四十畝買長沙民李萬甫田

五十
一坵

水塘

口屋基一所糧二石每畝租五斗共穀二十石

八尺河五十畝買長沙民何政清田

三十畝屋基

八糧二石每畝租二斗共穀十石

小河邊二十畝買長沙衛軍周邦田

十五畝屋基

所軍糧一石每畝租二斗共穀四石

湖塘下四十八畝五分

三十畝

屋基一所買長沙民

劉良善田糧二石五斗每畝租五斗共穀二十一石

石二斗

高小橋七十五畝

十九畝

天井塘一口屋基一所糧

三石五斗買長沙民易正甫田每畝租五斗共穀

三十七石五斗

中州七畝買長沙民盧淮田

四近

糧一斗一升每畝

租五斗共穀三石五斗

前所營十五畝典長沙縣民易允昌田

七近

屋基

所糧七斗每畝租三斗共穀四石五斗

高小橋二十六畝買長沙民易正元田

四十近

塘一

口屋基一所糧一石五斗每畝租五斗共穀十三石

天井畝七十畝買長沙民劉俊田

四十近

屋基

三石四斗每畝租三斗共穀十四石

易家湖一百零五畝買長沙民何興田四坵小

一口糧三石每畝二斗共穀二十一石

托頭山二十三畝買長沙衛軍何金田十一畝水

三口屋基一所軍糧一石五斗每畝租五斗共穀

十一石五斗

扛喪坪十七畝買長沙民高勝玘田八坵屋基一所

糧二石一斗六升每畝租五斗共穀十二石五斗

中州一百二十畝買長沙民盧清田五畝糧一石

每畝租三斗共穀三十六石大壩湖一口納租六

右

楓樹壠十畝買長沙民向文璠田

三糧三斗五升

花塘一口屋基一所每畝租二斗共穀二石

湖塘尾二十六畝五分買長沙民劉良善田

七斗

水塘一口屋基一所糧一石五斗每畝租五斗共

穀十三石二斗

包塘二十畝買長沙民劉習書田

十一畝塘一口屋

基一所糧一石每畝租五斗共穀十石

煙竹塘二十五畝買長沙軍譚明玘田

八斗水塘

三口屋基一所軍糧一石每畝租三斗共穀七石
神遊塘三十畝買長沙民蘇正甫田坵屋基一所
塘一口糧二石一斗七升每畝租三斗共穀九石
谷塘灣七十畝買長沙民張友信田六坵塘一口
糧一石每畝租二斗共穀十四石

彭家壠九十八畝買長沙軍彭友宣田十八坵屋基

一所屯糧三石五斗每畝租五斗共穀四十九石

天井湖五十三畝買長沙民劉高昊田五十坵糧一

石七斗每畝租二斗共穀十石六斗

黃沙港木瓜林七十畝買益鄉民高倫田_八畝_三糧
二石每畝租二斗共穀十四石

木瓜林十四畝買益鄉高積彥田_六畝_二屋基一所
糧一石每畝租二斗共穀二石八斗

董家壩三十畝買長沙民馬萬慶田_六畝_三土壩一
口糧一石每畝租二斗共穀六石

田湖尾二十七畝買長沙民譚伯億田_二畝_二屋基
一所糧七斗每畝租二斗共穀五石四斗

長坵邊四十五畝買長沙民何倫田_十畝_八屋基

所塘一口糧二石每畝租三斗共穀十三石五斗
石株茆茨灣一百八十畝買長沙民吳魁方田
坵屋基一所糧二石八升每畝租三斗共穀五十
四石

石株七十畝買長沙民羅必富田一坵屋基三處
塘一口糧二石八斗每畝租五斗共穀三十五石
前所營烏山下十畝買長沙民易允昭田一坵糧四
斗每畝租二斗共穀四石

土地壇四十四畝長沙民易正甫田一坵屋基一

所糧二石五斗每畝租五斗共穀二十二石

踏過實田一千四百四十九畝塘湖二十口住

地二十六所正糧五十一石八斗九升丙子粒

米七石共租四百八十八石七斗絕民劉光徹

田畝奉撫院黃衷按院鄧顯奇提學許

魯及布按守巡各處准發書院收租供生徒動

支修理知府孫存委照磨崔文祿同業主田隣

阡勘酌定糧差田種外定三則納租畫圖土名

畝塚載書冊二本附之郡邑收據仍載之志以

杜隱占之弊云

以上新舊共田一千八百二十四畝共該穀六百五十二石五斗整 又

嘉靖己亥知府季本增入田穀

湘陰縣二十九都土名馬坵楊九和田五十六畝六分該米一十五石五升折納穀三十石一斗

李政田三十七畝七分該米十石三升折穀二十石七升

主鎮田十八畝八分該米五石一升折穀十石三升

宜鄉四十九都地名板壁宋廷軌二十二畝六塘一口共該米七斗五升折穀一石五斗七升善化十七都地名暮橋湖賀東安湖田五畝該米七斗五升折穀一石五斗

以上共租六十三石三斗申詳巡按姚分巡或批免

庚子同知林華增入田穀

宜鄉六十三都地名梗湖塘黃廷作原買劉經
瀛鄧家灣等處低田七畝高田十畝仁垣山
後等處低田十八畝高田十五畝五分正糧七
鴛塘一口屋基一所共田五十畝正糧七
石一斗八升共租四十五石四斗內除完糧十
四石三斗實納穀三十一石四斗

按田皆豪有力者佃去每年折銀赴府首領官徵
候學道支用

萬厯丁巳學道鄒志隆增置道鄉臺田數

善化縣十五都地名龜塘業主譚延遷田四十
畝載糧二石七斗零每年納租四十石整內除
二十石完糧實交穀二十石整原交僧人本空
領供祭祀今歸府學收